

खबरां

1. विधानसभा चुनावं गी लेइयै असम च प्रचार पूरे जोर पर, प्रधानमंत्री ते वरिष्ठ बीजेपी नेता नरेंद्र मोदी होरें गोगामुख च रैली गी संबोधित कीता, उनें आखेआ जे गरीबें ते मध्य वर्ग दा कल्याण पार्टी दी पैहली प्राथमिकता रौह्ग।
2. राज्यसभा च केंद्री थेआरबंद पुलस बल (सामान्य प्रशासन) विधेयक 2026 पर चर्चा शुरू होई।
3. जी.एस.टी संग्रह मार्च च 8.8 फीसदी दे बाहे कन्नै दो लक्ख करोड़ रपे पुज्जा, वित्तीय बरे 2026 च 8.3 फीसदी दा उछाल दर्ज।
4. कनून नाफिस करने सरबंधत निदेशालय नै कोलकाता च 2 थाहें पर काले धन गी जायज बनाने दे मामले दे तैह्त छापे मारे।
5. पच्छिम एशिया संघर्ष बश्कार सरकार नै अज्ज भरोसा दोआया जे देश च हर चाल्ली दी फसलें दे बी सुद्दी मात्रा च उपलब्ध ना।
6. पच्छिम एशिया संघर्ष दे चलदे महानगरें च बवसायिक एल.पी.जी गैस सिलेंडर दी कीमत 195 रपे 50 पैहे बदी।
7. आई.पी.एल क्रिकेट च अज्ज लखनऊ सुपर जायंट्स दा मुकाबला दिल्ली कैपिटल्स कन्नै लखनऊ च होग।

<><><><><><>

PM-Assam

असम च विधानसभा चुनावं लेई प्रचार तेज होई गेआ ऐ। भारती जनता पार्टी दे सीनियर लीडर ते प्रधानमंत्री नरेंद्र मोदी होरें अज्ज असम दे गोगामुख च इक चुनावं रैली गी संबोधित करदे होई मोदी होरें आखेआ जे बीजेपी सारे दा सामा ते पूरा पराता विकास यकीनी बनाने लेई बुनियादी ढांचे, शिक्षा ते सेहत सेवाएं पर उप्परोतली ध्यान देआ'रदी ऐ। उनें आखेआ जे असम नै सेवा ते सुशासन दा नमा दौर दिक्खेआ ऐ ते उत्थे दी जनता अंदर बीजेपी दी सरकार नै नमा भरोसा पैदा कीता ऐ। उनें आखेआ कि असम दा एह चुनावं विकसित असम कन्नै विकसित भारत बनाने दा चुनावं ऐ ते ऐकती बीजेपी-एनडीए सरकार हैट्रिक लाने दी तैयारी च ऐ। प्रधानमंत्री होरें अज्ज असम दे चाह दे बागें च कम्म करने आहलें कन्नै बी गल्लबात कीती। उनें आखेआ जे असम जेडा पैहले छडी चाह दे नां कन्नै जानेआ जंदा हा, हून अपने सेमीकंडक्टर संयंत्र, जेहडा मोरीगांव च लाया गेदा ऐ, ओह्दे कारण बी अपनी पंछान बना करदा ऐ।

<><><><><><>

RS-CAPF Bill

राज्यसभा च केंद्री थेआरबंद पुलिस बल (सामान्य प्रशासन) विधेयक 2026 पर विचार ते इसी पास करने लेई बैहस अज्ज शुरू होई। केंद्री गृह राज्यमंत्री नित्यानंद राय होरें पिछले हफ्ते एह विधेयक पेश कीता हा। एहदा उद्देश्य केंद्री थेआरबंद बलें च ग्रुप-ए जनरल ड्यूटी अधिकारिणें ते होरनें अधिकारिणें दी भर्ती ते सेवा शर्तें कन्नै सरबंधत सामान्य नियमें गी बवस्थित करना ऐ। राज्यसभा च अज्ज चर्चा दी शुरुआत करदे होई तृणमूल कांग्रेस पार्टी दे साकेत गोखले होरें आखेआ कि केंद्री थेआरबंद बलें गी व्यापक रूप कन्नै देश दी रक्षा लेई पैहली पंक्ति मन्नेआ जंदा ऐ। उनें विधेयक दिणें नीतियें पर चिंता प्रगट कीता। बीजेपी दे बृज लाल होरें आखेआ जे विधेयक सी.ए.पी.एफ च ग्रुप-ए जनरल ड्यूटी अधिकारिणें लेई इक्के बरोबर ते संगठित ढांचा तैयार करने दी पेशकश करने दा प्रस्ताव करदा ऐ।

<><><><><><>

Kerala-Campaigning

केरलम च विधानसभा चुनावं आस्ते प्रचार लेई सिर्फ 6 दिन रेही गए ना प्रचार पूरे जोर पर ऐ, राजनीतिक दलें दे राज्य ते राश्ट्री नेता रोड शो ते चुनावी बैठकें च मसरूप ना। वरिष्ठ बीजेपी नेता ते रक्षा मंत्री राजनाथ सिंह होर

अज्ज तिरुवंतपुरम दे कोला पोथानकोडु च रोड शो च शामिल होडना वरिष्ठ कांग्रेस नेता ते तेलंगाना दे मुखमंत्री रेवंथ रेड्डी होर नेमीम च रोड शो करंगना वरिष्ठ सी.पी.एम नेता ते केरलम दे मुखमंत्री पिनाराई विजयन होर अलापुज्जा जिले च कार्जक्रमै च शिरकत करंगना बीजेपी दे राष्ट्री अध्यक्ष नितिन नबीन होर मट्टनूर च रोड शो करंगना तोआई, बीजेपी नेता ते केंद्री राज्यमंत्री डॉ. एल मुरुगन कोडुनगालूर ते देविकुलम च केई चुनावी कार्जक्रमें च शामिल होंगना कांग्रेस दे महासचिव के.सी वेनुगोपाल, सीपीएम पोलित ब्यूरो सदस्य प्रकाश करात सने दुए वरिष्ठ नेता बी केरले दे बक्ख-बक्ख जिलें च जनसभा करा'रदे ना।

<><><><><><>

### GST-Collection

पिछले बरे दे मुकाबले जीएसटी दा संग्रह 8.8 फीसदी बधिए इस बरे मार्च म्हीने च 2 लक्ख करोड़ तोड़ी होई गेआ ऐ। कुल जीएसटी राजस्व मार्च 2025 च 1 लक्ख 83 लक्ख करोड़ रपे हा। तोआई, कुल जीएसटी राजस्व बरे 2025-26 च 22 लक्ख करोड़ रपे पुज्जी गेआ।

<><><><><><>

### ED-Searches

कनून नाफिस करने आहला निदेशालय दे छापे कोलकाता दे बालेगुंजे इलाके दी दो थाहें पर चला'रदे न जिंदा सरबंध काले धन गी जायज बनाने दे मामले च ऐ। दुई बक्खी उद्योगपति ते कारोबारी पवन रूइया गी अज्ज विधाननगर अदालत च पेश कीता गेआ जेदा सरबंध साइबर फ्राड मामले कन्नै ऐ। पवन रूइया गी पुलस नै कल गिरफ्तार कीता हा।

<><><><><><>

### Interministerial-Breifing

पश्चिम एशिया संघर्ष बश्कार सरकार नै अज्ज आश्वासन दिता ऐ जे देश च हर चाल्ली दी फसलें दे बी सुद्दी मात्रा च उपलब्ध ना। पच्छिम एशिया च हाल दे घटनाक्रमें पर नमीं दिल्ली च आयोजित अंतरमंत्रालयी बैठक च कृषि ते किसान कल्याण विभाग दी अपर सचिव डॉ. मनिंदर कौर द्विवेदी होरें दस्सेआ जे देश भर च खरीफ फसलें दे 185 लक्ख क्विंटल थमां बढ़ बीऽ उपलब्ध ना। अपर सचिव नै आखेआ जे देश च कृषि रसायनें दी बी पर्याप्त उपलब्धता ऐ। पेट्रोलियम ते प्राकृतिक गैस मंत्रालय दी संयुक्त सचिव सुजाता शर्मा होरें आखेआ जे देश च कच्चे तेल दा भंडार वर्तमान च पर्याप्त ऐ। उनें गलाया जे सरकार नै अगले दो म्हीनें आस्तै पर्याप्त कच्चे तेल दी आपूर्ति सुनिश्चित करने दी बवस्था कीती दी ऐ। संयुक्त सचिव नै एहू बी दस्सेआ जे देश दी रिफाइनरियां अपनी मती क्षमता कन्नै कम्म करा'रदियां न ते खुदरा दुकानें पर ईंधन दी कोई कमी नेई ऐ। उनें आखेआ जे अंतर्राष्ट्री स्तर पर कीमतें च उतार-चढाव दे असर कन्नै घरेलू उपभोक्ताएं गी बचाने आस्तै सरकार नै पेट्रोल ते डीजल पर उत्पाद शुल्क घट्ट कीता ऐ तां जे कीमतें च बादा नेई होऐ।

<><><><><><>

### New-Fin. Reforms

अज्ज नमें वित्तीय बरे दी शुरूआत कन्नै मुख वित्तीय नियमें सने कई सुधार अज्जै कोला शुरू होई गए। करीब 6 दहाकें पराने आयकर कनून दी थाह नमें आयकर कनून 2025 नै अज्जै थमां लेई लैती ऐ। इसी टैक्स प्रणाली गी असान बनाने दे मकसद कन्नै तैयार कीता गेआ ऐ जेदे आस्तै जटिल कनूनें गी असान बनाया गेआ ऐ तां जे लोकें आस्तै इसी समझना असान होई जा। एहदे च पराने प्रावधानें गी हटाया गेआ ऐ। देश च हर डिजिटल भुगतान आस्तै दो फैक्टर एथेंटिफिकेशन यानि दो परतें आली सुरक्षा प्रणाली दी अमलावरी जरूरी ऐ जेदे सरबंध निर्देश भारती रिजर्व बैंक आसेआ जारी ना। बरे 2026-27 आस्तै फास्ट टैग सालाना पास फीस अज्जै कोला लागू होग।

<><><><><><>

## Vaishnav-Railways

रेलवे मंत्री अश्विनी वैश्वानर होंरें आखेआ ऐ जे रेलवे विकास आसतै रिकार्ड बजट मंजूर होने करी देश दे हर बसनीक गी लाहू पुज्जा'रदा ऐ। खास करिए गरीब ते मध्य वर्ग दे लोकें गी। लोकसभा च प्रश्नकाल दरान सवालें दे परते च वैश्वानर होंरें आखेआ जे पिछले 10 बरें च रेलवे सैक्टर च महत्वपूर्ण निवेश नै सिद्धे तौरा पर देशवासिएं गी फायदा दिता ऐ।

<><><><><><>

## VP-Book

उपराश्ट्रपति सी.पी राधाकृष्णन होंरें आखेआ ऐ कि संविधान सदन च 58 भित्ती चित्र, कलात्मक कम्मे कोला क्या मता महत्व रखदे ना। एहू भित्ती चित्र भारत दी सभ्यता यात्रा दी सामग्राम प्रस्तुति ऐ। उपराश्ट्रपति होंरें नमीं दिल्ली च राज्यसभा दी मिम्बर सुधामूर्ति हुंदे आसेआ लिखी दी कताब टाइम्स ऑफ टाइम दे विमोचन दरान एहू गल्ल आकषी। उनें आखेआ कि एहू कताब इक अनूठी ते अमर सुंदरता ते संसदी भित्ति चित्र दे पेशेवर प्रतीक दे रूपै च सदन दी शोभा बधांदे ना। इस मौके पर लोकसभा दे अध्यक्ष ओम बिरला होंरें आखेआ कि भारत दी सगोसार विरासत ते संसद चर्चा ते संवाद लेई छडा इक मंच नेई सगुआं भविष्य दिएं पीढ़िएं लेई प्रेरणा दा बी इक्क केंद्र ऐ।

<><><><><><>

## Parliament-ATF

संसद दे दवें सदनें अज्ज एविएशन ट्रिब्यून फ्यूल यानि ज्हाजें दे ईंधन पर 50 रपे प्रति लीटर बादू एक्साइज ड्यूटी लाने आसतै संवैधानिक प्रस्ताव गी मंजूरी देई दिती ऐ। वित्त राज्यमंत्री पंकज चौधरी होंरें केंद्री एक्साइज कनून 1944 दी सेक्शन 3 डी दे हेठ प्रस्ताव पेश कीता तां जे वित्त कनून 2002 दे 8मीं अधिसूचि च संशोधन कीता जा। एहू गें ब्हाई जात्तरा खेत्तर सरबंधत कच्चे तेल ते कम्मकाज दे खर्चे बढने करी लैता गेआ। इस पहल दा मकसद घरेलू डोआरिएं दे किराएं च मते उछाल गी घट्ट करदे होई वैश्विक ईंधन कीमतें ते जरूरत च तालमेल बनाना ऐ।

<><><><><><>

## Terrorist Killed

सुरक्षाबलें गांदरबल जिले च होए दे इक टाकरे च इक आतंकवादी गी मारी मकाया ऐ। कल संजा आतंकवादियें दी मजूदगी बारे इक टकोहदी सूह थहोने पर सुरक्षाबलें गांदरबल दे अराहाना इलाके च इक सांझा तुपाई अभियान चलाया। फौज दी चिनार कोर आसेआ सोशल मीडिया पर जारी जानकारी मुजब फौज ते जम्मू-कश्मीर पुलस नै संदिग्ध नक्लो-हरकत दिक्खने पर इलाके गी खंगालनें गितै पूरे इलाके गी घेरी लैता। ललकारें जाने पर संदिग्धें सुरक्षाबलें पर गोली चलाई- जेहदे पर जवाबी कारवाई कीती गई। इसै कारवाई च इक आतंकवादी मारेया गेआ ऐ। इलाके च सर्तकता बधाई दिती गेदी ऐ ते आतंकवादियें गी फगडने ते आम लोकें दी सुरक्षा यकीनी बनाने लेई लोडचदे एहतियाती उपाऽ बी बरते जा'रदे ना।

<><><><><><>

## IB-Secretary

1992 बैच दे वरिष्ठ आई.ए.एस अधिकारी चंचल कुमार होंरें सूचना ते प्रसारण मंत्रालय दे सचिव दा पदभार अज्ज कोला साम्भी लैता ऐ। उनें आईएएस अधिकारी संजय जाजू हुं'दी थाह लैती। बिहार काडर अधिकारी कुमार होर पैहले उत्तर पूर्वी क्षेत्र दे विकास सरबंधत मंत्रालय दे सचिव हे।

<><><><><><>

## LPG Price Hike

तेल कम्पनियें अज्ज थमां महानगरें च बवसायिक LPG गैस सलेंडर दी कीमत च 195 रपे 50 पैसे दा बाढा करी दिता ऐ। Indian Oil Corporation Ltd. दी वेबसाईट मुजब दिल्ली च बवसायिक LPG गैस सलेंडर दी कीमत 2 ज्हार 78 रपे 50 पैसे होई गई ऐ। इसै चाली कोलकाता च बवसायिक LPG सलेंडर दा मुल्ल 2 ज्हार 208 रपे मुम्बई च 2 ज्हार 31 रपे ते चेन्नै च 2 ज्हार 246 रपे होई गेआ ऐ। 19 किलोग्राम आसतै बवसायिक LPG सलेंडर दियां एहू नमियां कीमतां अज्ज थमां लागू होई गेइयां ना। ऊआं घरेलू LPG सलेंडरें दियें कीमतें च कोई बी तब्दीली नैई कीती गई ऐ।

<><><><><><>

## Rijju-LPG

संसदी मामलें दे केंद्री मंत्री किरण रिजिजू होरें विपक्ष दे इल्जाम गी गलत ठहराया ऐ जेदे च आखेआ गेआ जे सरकार पच्छमी एशिया संकट करी ईंधन ते दुई जरूरी चीजें दे बददे भाएं बारै चर्चा कोला बचा'रदी ऐ। उनें आखेआ जे इस मुद्दे पर पैहले गै संसद दे दवें सदनें च तफसीली बैहस होई चुकी दी ऐ। विपक्ष दे नेता मल्लिकार्जुन खड्गे हुंदी एलपीजी दी किल्लत पर संक्षिप्त चर्चा कराने दी मंग पर किरण रिजिजू होरें आखेआ जे प्रधानमंत्री नरेंद्र मोदी होरें दवें सदनें च वित्त बिल दी चर्चा दरान खुल्लियै गल्ल कीती ही।

<><><><><><>

## IPL

आई.पी.एल क्रिकेट च अज्ज लखनऊ सुपर जायंट्स दा मुकाबला दिल्ली कैपिटल्स कन्नै लखनऊ च होगा। मैच शामी साडे 7 बजे शुरू होगा।

<><><><><><>

## Weather

भारती मौसम विभाग नै छत्तीसगढ, महाराष्ट्र ते तेलंगाना च कल्लै तोड़ी बद्दल गरजने ते ओले पौने दी पेशगोई कीती ऐ। मेघालय ते असम च अज्ज तेज बरखा ते आंध्र प्रदेश च कल तोड़ी तेज बरखा दी मेद दस्सी गेदी ऐ। मौसम विभाग नै आखेआ ऐ जे उत्तर पच्छमी भारत च शुक्रवारें तोड़ी बल्ले-बल्ले तापमान च 2 थमां 4 डिग्री दा बाद्दा होगा। तोआई, विदर्भ, छत्तीसगढ, महाराष्ट्र ते देश दे पूर्वी हिस्सें च कल्लै तोड़ी बद्दोबद्द तापमान च 2 थमां 4 डिग्री दी गिरावट आई सकदी ऐ।

<><><><><><>

## Weather

मौसम विभाग नै जम्मू-कश्मीर लेई मौसम सरबंधी सलाह जारी कीती ऐ जेह्दे मूजब, प्रदेश च किश थाहें पर कल्लै धोड़ी हौली बरखा बरने दी मेद ऐ। एह्दे परेंत 3 ते 4 अप्रैल गी केई सारी थाहें पर बरखा, उच्चे प्हाडी इलाकें च बर्फबारी ते 30 शा 40 किलोमीटर प्रति घंटे दी रफ्तार कन्नै तेज ब्हाऽ चलने दे कन्नोकन्नी शमानी बिजली मिलकने ते प्हाडी इलाकें च किश थाहें ल्हास-पस्सियां पौने दा बी जोखिम ऐ। करसानें गी सलाह दिती गेई ऐ जे ओह कल 2 अप्रैल धोड़ी अपने खेत्तरें दा कम्म सबूरा करी लैन ते आम लोकें गी बी लोडचदा ऐ जे ओह ट्रैफिक सरबंधी दिशा-निर्देशें दी पालमा करना।

<><><><><><>

## Dy CM Regularization

उपमुखमंत्री सुरिंद्र चौधरी होरें ध्याडीदारें गी मरहलेवार ते बवस्थित ढंग्गै नै पक्का करने दी सरकार दी बचनबद्धता गी फ्ही पक्का कीता ऐ। इस सरबंधै च विधानसभा दे अंदर दित्ते गेदे असश्वासनें दे महत्वै पर लोऽ पांदे होई उपमुखमंत्री होरें आखेआ जे मुखमंत्री उमर अब्दुल्ला होरें पैहले गै इस गल्लै दा वायदा कीते दा ऐ जे ध्याडीदारें दिएं सेवाएं गी उं'दे कार्यकाल दे दरान गै पक्का कीता जाह्ग। उं'नें आखेआ जे सदन च जिसलै इस चाल्ली दा बयान दित्ता गेदा होऐ तां उसी पक्क गै संजीदगी कन्नै लैत्ता जाना लोडचदा ऐ। उं'नें आखेआ जे ध्याडीदारें आसेआ बार-बार कीते जाने आले प्रदर्शन गैर जरूरी ना।

<><><><><><>